



Tignî dentri il cûr i bieci ricuarts al è come sparagnâ cualchi franc par cuant che tu âs une bisugne: no simpri dut al vâ ben, se capite une malatie, bisugne rivâ sostentâsi par no dâ pês a di nissun.

A lis voltis però o vin bisugne ancje dal sostentament morâl, ch'al jude a lâ indenant. Chel al varès di jessî dentri di no, par dâ un jutori cun robis piçulis e grandis, che te normalitât dal

vivi a capitin. Un compliment fat di une agne, un rap di ue puartât di un barbe di to pari e chel caco madûr ch'al tignive tes mans cul colôr di un biel soreli a mont.

Chest omenon al veve fat dôs gvueris, Afriche, Italie, po le ultime dal cuarante passade a dâ coragjo a ducj, cuntun cûr grant; al contave che se lui al jere rivât a superâ chês robis brutis ta chei puescj forescj, le varessin fate ancje lôr e chest i veve insegnât a volê ben e no a copâ. Ancje lis lacrimis di chei ch'a scugnivin partî tal forest, par vuadagnâsi la bocjade a varessin fat cressi e comprendi il dolôr par fâlu diventâ sostegn.

Se il to cûr al à tignût dentri i moments biei e par vistî chei bruts, dut chest al devente un tesaur ch'al po' fâ invidie ae BCE e no ti coventaran par lâ indenant ni bancjis, ni cjadreis. Tes mans tu âs une recipe e dal to jessi al nassarà alt e fuart un *jufufui* l'“evviva” furlan ch'al cricarà qualsiasi gnot scure, come chê che ch'o stin vivint cumò.

di Marisa Gregoris

#1088